

摘藻堂四庫全書薈要

史部

欽定四庫全書薈要

史部

元史卷八十四

五



欽定四庫全書薈要卷六千四百六十三

史部

元史卷八十四

明翰林學士亞中大夫知制誥兼修國史宋濂等修



第三十四

選舉四

考課

凡隨朝職官至元六年格一考陞一等兩考通陞二等
止六部侍郎正四品依舊例通理八十月陞三品左右

司郎中員外郎都事考滿陞二等六部郎中員外郎主事三十月考滿陞一等兩考通陞二等

凡官員考數省部定擬從九品擬歷三任陞從八正九品歷兩任陞從八正八品歷三任陞從七從七歷三任呈省正七歷兩任陞從六從六品通歷三任陞從五正六歷兩任陞從五從五轉至正五緣四品闕少通歷兩任須歷上州尹一任方入四品內外正從四品通理八十月陞三品

凡取會行止中統三年詔置簿立式取會各官姓名籍貫年甲入仕次第至元十九年諸職官解由到省部考其功過以憑黜陟大德元年外任官解由到吏部止於刑部照過將各人所歷立行止簿就檢照定擬

凡職官迴降至元十九年定江淮官已受宣敕資品相應例陞二等遷去江淮官員依舊於江淮任用其已考滿者並免回降不及考者例存一等有出身未合入流品受宣者任迴三品擬同六品四品擬同七品正從五

品同正八品受敕者正從六品同從八品七品八品同
正從九品正從九品同提領案牘巡檢無出身及白身
人受宣者三品同七品四品同八品正從五品同正九
品受敕者正從六品同從九品七品八品同提領案牘
巡檢正從九品擬院務監當官其上項有資品人員再
於接連福建兩廣溪洞州郡任用擬陞一等兩廣福建
別議陞轉 至元十四年都省未注江淮官已前創立
官府招撫百姓實有勞績者其見受職名若應受宣者

三品同七品四品五品擬同八品若應受敕者正從六品同正從九品其七品八品擬同提控案牘巡檢正從九品擬同院務監當官無出身不應敘白身人其見受職名應受宣者三品同八品四品五品同九品應受敕者正從六品同提控案牘巡檢七品以下擬院務監當官其上項人員若再於接連福建兩廣溪洞州郡任用擬陞一等兩廣福建別議陞轉至元十四年已後新收撫州郡准上例定奪前資不應又陞二等遷去江淮

官員任迴擬定前資合得品級於上例陞二等止於江
淮遷轉若於腹裏任用並依上例七品以下已歷三品
四品者比附上項有出身未入流品人員例從一高前
三件於見擬資品上增一等銓注 二十一年詔軍官
轉入民職已受宣勅不曾之任者擬自准定資品換授
從禮任月日為始理算資考陞轉若先受宣敕已經禮
任資品相應者通理月日陞轉外據驟陞人員前任所
歷月日除一考外餘月日與後任月日依准定資品通

理陞轉不及考者擬自准定資品換授從禮任月日為始理算資考陞轉腹裏常調官除資品相應者依例陞轉外有前資未應入流品受宣敕者六品以下人員照勘有無出身依驗職事品秩自受敕以後歷一考者同江淮例定擬不及考者更陞一等五品以上人員斟酌比附議擬呈省據在前已經除授者任迴通理定奪凡吏屬年勞差等至元六年吏部呈省部譯史通事舊以一百二十月出職今案牘繁冗合以九十月為滿

十九年部擬行省通事譯史令史宣使或經例革替
罷所歷月日不等如元經省掾發去不及一考者擬令
貼補及一考之上者比臺院令史出身例定奪自行踏
逐者降一等敘不及一考者發還本省區用宣慰司人
吏經省院發不及一考者擬貼補及一考之上者比部
令史出身降一等定奪自行踏逐者又降一等不及一
考者別無定奪二十年省擬雲南行省極邊重地令
譯史人等六十月考滿甘肅行省令譯史人等六十

五月考滿本土人員依舊例用 二十五年省准緬中行省令史依雲南行省一體出身 大德元年省臣奏以省臺院諸衙門令譯史通事知印宣使等舊以九十月為滿陞遷太驟今以一百二十月為滿於應得職事內陞用又寫聖旨掌奏事選法應辦刑名文字筆且齊等以八月折十月今後毋令折算 四年制以諸衙門令譯史宣使人等一百二十月為滿部議遠方令譯史人等甘肅福建四川於此發去九十月為滿兩廣海北

海南道於此發去八十月滿雲南省八十月滿土人一
百二十月滿都省議俱以九十月為考滿土人依例一
百二十月為滿至大元年部議和琳行省即係遠方
其人吏比四川甘肅行省九十月出職二年詔中外
吏員人等依世祖定制以九十月滿參詳歷一百二十
月已受除者依大德十一年內制外任減一資所有詔
書已後在選未曾除受并見告滿之人歷一百二十月
者合同四考理算外任一資不須再減省擬以九十月

為滿餘有月日後任理算應滿而不離役者雖有役過月日不准 三年省准河西廉訪司書吏人等月日部議合准舊例雲南六十月河西四川六十五月土人九十月為滿 皇慶二年部議凡內外諸司吏員舊以九十月為滿大德元年改一百二十月為滿至大二年復舊制一紀之間受除者衆其元除有以三十月為一考者亦有四十月為一考者以所除不等往往援例陳訴有礙選法擬合依已降詔條為格係大德元年三月七

日以後入役至未復舊制之前已除未除俱以四十月為一考通理一百二十月為滿減資陞轉其未滿受除者一體理考定擬餘二十六月已上准陞一等十五月之上減外任一資十五月之下後任理算改格之後應滿而不離役者役過月日別無定奪

凡吏員考滿授從六品 至元九年省准省令史出身中統四年已前六品陞遷已後七品除授至元之後事繁責重宜依准中統四年已前考滿一體注授 三十

一年省議三師僚屬蒙古筆且齊掾史宣使等依都省
設置若不由臺院轉補者降等敘 元貞元年省議監
修國史僚屬依三師所設非臺院轉補者降等敘 大
德五年部呈考滿省掾各各資品省議今後院臺并行
省令史選充省掾者雖理考滿須歷三十月方許出職
仍分省發自行踏逐者各部令史毋得直理省掾月日
凡吏員考滿授正七品 至元九年部擬院臺大司農
司令史出身三考正七品一考之上驗月日定奪一考

之下二十月以上為從八品十五月以上正九品十五
月以下十月之上為從九品添一資歷十月以下為巡
檢 十一年部議扎爾古齊令史譯史考滿合依樞密
院御史臺令史譯史出身三考出為正七品自用者降
一等有關於部令史內選取 十四年部擬前諸站統
領使司令史同部令史出身今既改通政院從二品通
事譯史令史人等宜同臺院人吏一體出身 十五年
翰林國史院言本院令史係省准人員其出身與御史

臺一體遇闕省掾時亦合勾補准吏部牒本院令史以
九十月考滿同部令史出身本院與御史臺皆隨朝二
品令史亦合與臺令史一體出身有關於部令史內選
用 十九年部擬泉府司隨朝從二品令史譯史人等
由省部發者考滿依通政院例定奪自行用者降一等
二十年定擬安西王王相府首領官令史與臺院吏
屬一體遷轉 二十二年部擬宣徽院陞為二品與臺
院品秩相同令史出身合依正七品遷除貢補省院有

關於部令史內選取 總制院與御史臺俱為正二品

部擬令譯史考滿亦合一體出身 二十三年省准詹

事院掾史若六部選充者考滿出為正七品自用者降

等 二十四年集賢院言本院與翰林國史院品級相

同省議令史考滿一體定奪 二十五年省議上都留

守司兼本路總管府令史出身三考正八品其自部令

史內選取者同宣徽院太醫院令史一體出身上都留

守司陞為正二品見設令史自行踏逐者考滿不為例

從七品內選用部令史內選取考滿宣徽院大司農司
令史一體出身 部議都護府人吏依通政院令譯史
人等出身由省部發者考滿出為正七品自用者降一
等 二十六年省准都功德使司隨朝二品令譯史人
等比臺院人吏一體陞轉 二十九年部呈大司徒令
史若各部選發者三考出為正九自用者降等 崇福
司與都護府泉府司品秩相同所設人吏由省部發者
考滿出為正七品自用者降一等 福建省征瓜哇所

設人吏出征迴還俱同考滿 三十年省准將作院令

史依通政院等衙門令史考滿除正七品部議如係六

部選發考滿除正七品自用者本衙門敘 元貞元年

內史府秩正二品令史亦於部令史內收補考滿除正

七品自用者降等 大德九年部擬庫庫楚大司徒令

史若各部選發考滿正七自用者降等 至大四年省

准會福院令史知印通事譯史宣使典史俱自用前擬

不拘常調考滿本衙門區用隆禧院令史人等如常選

者考滿依例遷敘自用者不入常調於本衙門區用

皇慶二年部議崇祥院人吏係部令史發補者依例遷
用不應者降等敘 延祐四年部議隆禧院令史譯史

通事知印典吏同五臺殊祥院人吏一體常選內委付
其出身若有曾歷寺監并籍記各部令史人等考滿同
二品衙門出身降等敘白身者降等添一資陞轉省部
發去者依例遷敘後有闕令史須於常選教授儒人職
官并部令史見役上名內取補宣使於職官并相應內

久補通事知印從長官保選仍參用職官違例補充別無定奪殊祥院人吏先未定擬亦合一體

凡吏員考滿授從七品 至元六年省擬部令史譯史通事人等中統四年正月以前收補者擬九十月為滿注從七品迴降正八一任還入從七以後充者亦擬九十月為滿正八品仍免回降 九年吏禮部擬凡部令史二考注從七品一考之上驗月日定奪一考之下二十月以上者正九品十五月以上從九品十五月以下

令史提控案牘通事譯史巡檢 太府監改擬正三品

與六部同人吏自行踏逐將已歷月日准為資考似為
不倫擬自改陞月日為始九十月為滿同部令史出職
有關於籍記部令史內挨次收補 十一年省議省斷

事官令史與六部令史一體出身若是實歷俸九十月
考滿遷除有關於應補部令史人內挨次補用 省

議中御府正三品擬同太府監令史出身九十月於從
七品內除授自行踏逐者降一等歇下名關於應補部

令史人內補填 十三年省議行工部令史與六部令

史一體出身 四集賽令史九十月同部令史出身有

闕以籍記部令史內補填 二十年部呈行省令譯史

人等比臺院一體出身行臺行院令譯史通事人等九

十月考滿元係都省臺院發去及應補之人合降臺院

一等 二十三年省判大都留守司兼少府監令史如

係省部發去相應人員同部令史出身九十月考滿從

七品自行踏逐者降等 二十四年省判中尚監令史

人等若係省部發去人員同太府監令譯史等出身自行踏逐者降等 太史院令史部議如省部發去人員從七品內遷除自行踏逐者降等敘用 部擬行省臺院令史九十月考滿若係都省臺院發去腹裏請俸人員行省令史同臺院令史出身行臺行院降一等俱於腹裏遷用自行踏逐遞降一等於江南任用 二十九年省判鞏昌等處便宜都總帥府令史人等出身擬與各道宣慰司一體自行踏逐者降等敘用 大德三年

省准上都留守司令史舊以見役部令史發補以籍居懸遠擬於籍記部令史內選發與六部見役令史一體轉陞二品衙門令史轉補不盡者考滿從七品敘用

八年部擬利用監自大德三年八月已前入役者若充各衙門有俸令史及本監奏差典吏轉補則於應得資品內選用由庫子巴哩巴就陞并白身人於雜職內通理定奪自用之人本監委用 皇慶元年制典瑞監人吏俱與七品出身部議太府利用等四監同省發者考

滿與六部一體敘其餘寺監令譯史正八品奏差正九品令典瑞監前典寶監人吏出身同大府等監係奉旨事理省議已除者依舊例定奪 三年省准章慶使司秩正二品見役人吏若同隨朝二品衙門考滿除正七品緣係徽政院所轄司屬量擬考滿除從七品自用者降等如係及考部令史轉充考滿正七品未及考者止除從七品有闕須依例補不許自用

凡吏員考滿授正八品 至元十一年省議祕書監從

三品令史擬九十月出為正八品自用者降一等有闕
諸衙門考滿典吏內補填 省議太常寺正三品令史
以九十月出為從八品有關於應補監令史內取用

省議少府監正四品准軍器監令史出身是省部發去
者三考於正八品任用自行踏逐人員考滿降一等

省議尚牧監正四品省部發去令史擬九十月出為正
八品自用者降一等有關於諸衙門典吏內選補 部
擬河南等路宣慰司係外任從二品與隨朝各部正三

品衙門相同准令史以九十月同部令史遷轉開元等
路宣撫司外任正三品令譯史比前例降一等九十月
於正八品內遷轉十四年部擬樞密院斷事官令史
擬以九十月出為從八品有關於諸衙門考滿典吏內
補用十六年部擬樞密院斷事官今改從三品所設
人吏若係上司發去人員歷九十月比省斷事官令史
降等於正八品內遷除自用者降一等遇闕於相應人
內發遣二十一年部擬廣西海北海南道宣慰司令

史譯史奏差人等與嶺南廣西道等處按察司書吏人等一體二十月理算一考擬六十月同考滿 省准廣東宣慰司其地倚山瀕海極邊烟瘴令史議合優陞依泉州行省令譯史等以二十月理算一考 二十二年省准詹事院府正家令二司給侍宮闈正班三品令史即非各司自用人員俸秩與六部同若遇院掾史有關於兩司令史內遷補擬定資品出身依樞密院所轄各衛令史出身考滿出為正八品 尚醞監令史與六部

令史同議諸監令史考滿正八品內遷用及非省部發
去者例降一等尚醞監令史亦合一體 二十三年省
准太常寺令史歷九十月正八品內任用有關於呈准
籍記人內選取 雲南省羅羅斯宣慰司兼管軍萬戶
府首領官令史人等依雲南行省令史例六十月考滿
首領官令史人等三十月為一考 武備寺正三品令
譯史等出身擬先司農寺令譯史人等依各監例考滿
出為正八品武備寺令史亦合依例遷敘 尚舍監令

史擬同諸寺監令史考滿授正八品自行用者降一等
尚舍監亦如之 陝西四川行省順元等路軍民宣慰

司依雲南令譯史人等六十月為滿遷轉 二十四年

部擬太史院武備寺光祿寺等令史九十月正八品內
遷用自用者降一等太醫院係宣徽院所轄令史人等
若係省部發去考滿同諸監令史擬正八品自用者降
等任用 二十六年省准給事中兼修起居注人吏依
諸寺監令史出身例考滿一體定奪 侍儀司令史依

給事中兼起居注人吏遷轉 二十七年省准延慶司

令史九十月依已准家令府正兩司例由省部發者出

為正八品自用者降等敘 二十八年省准太僕寺擬

比尚乘等寺令史以九十月出為正八品自用者降一

等 拱衛直都指揮使司與武備寺同品令史考滿出

為從八品自用者降一等遷用 蒙古等衛令史即係

在先考滿令史合於正八品內遷敘各衛令史有闕由

省部籍記選發者考滿出為正八品樞密院所轄都元

帥府萬戶府各衛并屯田等司官吏俱從本院定奪遷
調見役令史自用者考滿合從本院定奪 宣政院斷
事官令史與樞密院及蒙古筆且齊由翰林院發者以
九十月為從七品通事令史以九十月為正八品奏差
以九十月為正九品典吏九十月轉本府奏差自用者
降等 二十九年部擬兩江宣慰司都元帥府令譯史
人等依雲南兩廣福建人吏六十月為滿兩廣敕用譯
史除從七品非翰林院選發別無定奪令史省發考滿

正八品奏差省發考滿正九品自用者降等敘

儀鳳司令史比同侍儀司令史考滿為正八品自用者降一等 哈瑪爾為頭扎哈齊巴勒噶遜達魯噶齊令史

吏部議與阿蘇巴圖爾達魯噶齊筆且齊均考滿正八品任用雖筆且齊令史月俸不同各官隨朝近侍一體比依例出身相應 三十年省准博克遜係正三品令譯史人等比依各寺監令譯史出身相應 都水監從三品令譯史等依寺監令史一體出身考滿正八品敘自

用者降等 濟爾噶呼實保齊巴勒噶遜達魯噶齊本
處隨朝正三品與扎哈齊巴勒噶遜達魯噶齊令史等
即係一體擬合依例考滿出為正八品 元貞元年省
准拉瑪伊克監令譯史人等省部發去者考滿正八品
內任用自行踏逐者降等 家令司府正司改內宰宮
正其人吏依元定為當 拱衛直都指揮使司陞為正
三品其令譯史等俸俱與光祿寺相同擬係相應人內
發補考滿與正八品奏差正九自用者降等敕 大德

三年部擬鷹坊總管府人吏依隨朝三品考滿正八品
內遷用 五年部擬和琳宣慰司都元帥府人吏合與
隨朝二品衙門一體及量減月日部議各道宣慰司令
史一百二十月正八品敘自用者降等遷用其和琳宣
慰司無應取司屬地又酷寒人吏已蒙都省從優以九
十月為滿今擬考滿不分自用俱於正八品內遷用
八年部言行都水監准設人吏令史八人奏差六人
壕寨一十人通事知印各一人譯史一人公使人二十

人部水監令譯史通事知印考滿俱於正八品遷用奏
差考滿正九品自用者降等壕寨出身并俸給同奏差
行都水監係江南勦立衙門令史比例合於行省所轄
常調提控案牘內選取奏差壕寨人等亦須選相應人
考滿比都水監人吏降等江南遷用典吏公使人從本
監自用 九年部言尚乘寺援武備寺大府章佩等監
例求陞加其人吏出身俸給議得各監人吏皆係奉旨
陞加尚乘寺人吏合依已擬 至大三年部言和琳係

邊遠酷寒之地兵馬司司吏歷一考餘轉本路總管府
司吏補不盡者六十月陞都目總管府吏再歷一考轉
青海宣慰司令史考滿除正八品不係本路司吏轉補
者降等敘補不盡者六十月部劄提控案牘內任用蒙
古筆且齊比上例定奪 部議晉王位下斷事官正三
品除克埒穆爾齊知印例從長官所保蒙古筆且齊翰
林院發令史以內史府考滿典吏并籍記寺監令史發
補九十月除正八品與職官參用奏差亦須選相應人

九十月依例遷用自用者考滿本衙門定奪 皇慶元

年部言衛率府勾當人員令都省與常選出身議得令

史係軍司勾當之人未有轉受民職定奪合自奏准日

為格係皇慶元年二月九日以前者同典牧監一體遷

敘以後者若係籍記寺監令史常選提控案牘補充依

上銓除自用者不入常調 部議徹政院繕珍司見役

令史若係籍記寺監令史常調提控案牘院兩考之上

典吏補充內宰司令史例考滿除正八通事譯史知印

亦依上遷敘自用者降等後有關須依例發補違例補
充別無定奪 二年部議徽政院延福司見役令吏若
係籍記寺監令吏常調提控案牘本院兩考之上典吏
補充者依內宰司令吏例考滿除正八品通事譯史知
印依上遷敘自用者降等後有關須依例發補不許自
用 延祐三年省准徽政院所轄衛候司奉旨陞正三
品與拱衛直都指揮使司同品合設令譯史考滿除正
八自用者降等衛候司就用前衛候司八吏擬自呈准

月日理算考滿同自用遷敘後有闕以相應人補考滿
依例敘 徽政院掌飲司人吏部議常選發補令譯史
考滿從八奏差從九自用者降等後有闕須以相應人
補違例補充考滿本衙門用 四年省准屯儲總管萬
戶府司吏譯史出身至大二年尚書省劄和琳路司吏
未定出身和琳係邊遠酷寒去處兵馬司司吏如歷一
考之上轉補本路司吏并總管府司吏再歷一考之上
轉補青海宣慰司令史考滿正八品遷除補不盡人數

從優擬六十月於部劄提控案牘內任用蒙古筆且齊
比依上例定奪其沙州瓜州立屯儲總管萬戶府衙門
即係邊遠酷寒地面依和琳路總管府司吏人員一體
出身

凡吏員考滿授正九品 至元二十年省准宮籍監係
隨朝從五品令吏擬九十月正九品例革人員驗月日
定奪自行踏逐降一等 二十八年省擬廉訪司所設
人吏擬選取書吏止依按察司舊例上名者依例貢部

下名轉補察院貢補不盡人數廉訪司月日為始理算
考滿者正九品敘須令迴避本司分治及元籍路分

部議察院書吏出身除見役人三十月轉補不盡者九
十月出為從八品察院書吏有闕止於各道廉訪司書
吏內選取依上三十月轉部九十月從八品如非廉訪
司書吏取充者四十五月轉部補不盡者九十月考滿
降一等出為正九品 三十年省准行臺察院書吏歷
一考之上者轉江南宣慰司令史并內臺察院書吏於

見役人內用之若有用不盡人數以九十月出為正九品江南有闕依內臺察院書吏於各道廉訪司書吏內選取依例轉補大德四年省擬各道廉訪司書吏至元二十八年七月元定出身上名貢部下名轉補察院書吏貢補不盡者廉訪司為始理算月日考滿正九品用今議廉訪司先役書吏歷九十月依已定出身正九品注任回添一資陞轉大德元年三月七日已後充廉訪司人吏九十月考滿須歷提控案牘一任於從九品

內用通事譯史比依上例 察院書吏至元二十八年十一月元定出身於各道廉訪司書吏內選取三十月轉部九十月從八品內用如非廉訪司書吏取充者四十五月轉部補用不盡者九十月考滿降一等正九品用今議先役書吏九十月依已定出身遷用任回添一資陞轉大德元年三月七日為始入役者止依舊例轉部 行臺察院書吏至元三十年正月元定出身於廉訪司書吏內選取歷一考之上轉補江南宣慰司令

史并內臺察院書吏用不盡者九十月正九品江南用
省議先後書吏歷俸九十月依已定出身任回添一資
陞轉大德元年三月七日始勅入者止依舊例轉補江
南宣慰司令史北人貢內臺察院

凡吏員考滿除錢穀官案牘都吏目 至元十三年吏
禮言各路司吏年四十五以下以次轉補按察司書吏
補不盡者歷九十月於都目內任用六十月以上於吏
目內任用 省議上都大都路司吏難同其餘路分出

身依按察司書吏遷用 十四年省准覆實司司吏俱
授吏部劄付如歷九十月擬於中州都目內遷若不滿
考及六十月於下州吏目內任用有闕以相應人發充
二十一年省准諸色人匠總管府與少府監不同又
其餘相體管匠衙門人吏俱未定擬出身量擬比外路
總管府司吏考滿於都目內任用 二十二年省准大
都等路都轉運使司令史與河間等路都轉運鹽使司
書吏出身同外路總管府司吏三名貢舉儒吏二名貢

不盡年四十五之上考滿都目內任用 二十三年省

准各路司吏轉運司書吏年四十五以上厯俸六十月

充吏目九十月充都目餘有役過月日不用奏差宜從

行省斟酌月日量於錢穀官內就便銓用 省准覆實

司係正五品令史出身比交鈔提舉司司吏出身九十

月務使六十月都監六十月之下四十五月之上都監

添一界遷用四十五月之下轉補運司令史 部擬京

畿漕運司司吏轉補察院書吏不盡四十五以上九十

月依例於都目內任用 二十四年部議各道巡行勸

農官書吏於各路總管府上名司吏內選取考滿於提

控案牘內任用奏差從大司農司選委 省准諸司局

人匠總管府令吏於都目內任用 二十五年省准大

護國仁王寺昭應宮財用規運總管府令譯史人等比

大都路總管府正三品司吏九十月提控案牘內任用

部議甘肅寧夏等處巡行勸農司係邊陲遠地人吏

依甘肅行省并河西隴北道提刑按察司以二十二月

准一考六十五月為滿 省准供膳司司吏比覆實司

司吏九十月出身於務使內任用 二十六年省准巡

行勸農司書吏役過路司吏月日三折二准算通理九

十月於提控案牘內遷敘 尚書省右司郎中管領大

都等路打捕民匠等戶總管令吏比依諸司局人匠總

管府令吏例九十月於都目內任用 省准諸路寶鈔

都提舉司司吏有關於諸路轉運司漕運司上名司吏

內選取三十月充吏目四十五月之上六十月之下都

目六十月已上轉提控案牘充寺監令史者聽諸路寶鈔提舉司同 奏准大都路都總管府添設司吏一十

名委差五名司吏六十月於提控案牘內任用委差於近上錢穀官內委用有關以有根脚請俸人補充不及考滿不許無故替換 二十七年省准京畿都漕運司令史九十月充提控案牘年四十五之上比依都提舉萬億庫司吏願充寺監令史者聽 二十九年部擬大都路令史四十五以上六十月提控案牘內任用任回

減一資陞轉四十五以下六十月之上遷舉貢部每歲

二名奏差六十月酌中錢穀官內任用 省准京畿都

漕運司令史比依諸路寶鈔提舉司司吏出身例三十

月吏目四十五月之上六十月之下都目六十月之上

提控案牘 三十年省准提舉八作司係正六品司吏

四十五月之上吏目六十月之上都目 元貞元年省

准大都等路都轉運司令史九十月提控案牘 大德

三年省准諸路寶鈔提舉司都提舉萬億四庫司吏九

十月提控案牘內任用如六十月之上自願告敘者於都目內遷除有關於平准行用庫攢典內挨次轉補

省准寶鈔總庫司提舉富寧庫司俱係從五品其司吏九十月都目內任用如六十月之上自願告敘於吏目內遷除有關於在京五品衙門及左右巡院大興宛平二縣及諸州司吏并籍記各部典吏內選省准提舉左右八作司吏九十月都目內任用六十月之上自願告敘於吏目內遷除有關於在都諸倉攢典內選補

京畿都漕運使司令吏六十月之上於提控案牘內

用遇闕於路府諸州并在京五品等衙門上名司吏內

選大都路司吏改為令吏六十月之上年及四十五

以下貢部不過二名四十五以上六十月提控案牘內

遷用任回減資陞轉大都路都總管府令吏依舊六十

月於提控案牘內遷敘不須減資有關於府州兵馬司

左右巡院大興宛平二縣上名司吏內選補大德五

年省准河東宣慰使司軍儲所司吏譯吏九十月為滿

譯史由翰林院發補司吏由州縣司吏取充與各路總
管府譯史司吏一體陞轉自用譯史別無定奪司吏除
酌中錢穀官委差近下錢穀官 七年部擬濟南萊蕪
等處鐵冶都提舉司及廣平彰德等處鐵冶都提舉司
秩四品司吏九十月比散府上州例陞吏目蒙古筆且
齊擬酌中錢穀官奏差近下錢穀官典吏三考轉本司
奏差 省准陝西省敘州等處諸部蠻夷宣撫司正三
品其令譯史考滿比各路司吏人等一體遷用奏差行

省定奪 九年宣慰司大同等處屯儲軍民總管萬戶

府從三品司吏譯史委差人等九十月為滿司吏除酌
中錢穀官委差近下錢穀官 大德十年省准諸路吏

六十月須歷五萬石之上倉官一界陞吏目兩考陞都
目一考陞中州案牘或錢穀官通理九十月入流五萬
石之下倉官一界陞吏目兩考都目一考依上陞轉補
不盡路吏九十月陞吏目兩考陞都目依上流轉如非
州縣司吏轉補者役過月日別無定奪

凡通事譯史考滿遷敘 至元二年部擬雲南行省極
邊重地令譯史等人員擬二十月為一考歷六十月准
考滿敘用 九年省准省部臺院所設知印人等所請
俸給元擬出身俱在勾當官之上既將勾當官陞作從
八品其各部知印考滿亦合陞正八品據例減知印除
有前資人員驗前資定奪無前資者各驗實歷月日定
擬遷敘 二十年各道按察司奏差通事譯史奏差已
有定例通事九十月考滿擬同譯史一體遷敘 部議

行省行臺行院五品以下官員并首領官亦合比依臺院例一考陞一等任用據行省人吏比同臺院人吏出身已有定例行院行臺令史譯史通事宣使人等九十月滿考元係都省臺院發及應補者擬降臺院一等定奪部擬甘肅行省令譯史通事宣使人等量擬以六十五月遷敘若係都省發去人員如部議自用者仍舊例二十一年部議四川行省人吏比甘肅行省所厯月日一體遷除二十三年部擬福建兩廣行省令譯

史通事宣使人等擬歷六十月同考滿止於江南遷用若行省咨保福建兩廣必用人員於資品上陞一等

二十四年部議行省行臺行院令史九十月考滿若係都省臺院發去腹裏相應人員行省令史同臺院令史出身行臺行院降臺院一等俱於腹裏遷用自用者遞降一等止於江南任用 二十七年省議中書省蒙古筆且齊俱係正從五品遷除今蒙古字教授擬比儒學教授例高一等其筆且齊擬高省掾一等內外諸衙門

蒙古譯史一體陞等遷敘 二十八年部擬諸路寶鈔
都提舉司蒙古筆且齊三十月吏目四十五月都目六
十月提控案牘後過月日擬於巡檢內敘用奏差九十
月近上錢穀官六十月酌中錢穀官內任用 翰林院
寫聖旨筆且齊比依都省蒙古筆且齊內管宣勅者八
月算十月遷轉正六品部議寫聖旨筆且齊比依管宣
勅蒙古筆且齊一體亦合八折十推算月日外據出身
已有定例 崇福司令譯史知印省部發補者考滿出

為正七品自用者降一等宣使省部發去者考滿出為

正八品自用者降一等 各道廉訪司通事譯史出身

比依書吏擬合一體考滿正九奏差考滿依通事譯史

降二等量擬於省劄錢穀官并巡檢內任用 三十年

省准將作院令譯史人等由省部選發者考滿正七品

遷敘自用者止從本衙門定奪 大都路蒙古筆且齊

若係例後入役人員擬六十月於巡檢內遷用任回減

一資陞轉 大德三年省議各路譯史如係翰林院選

發人員九十月考滿除蒙古人依准所擬外其餘色目

漢人先歷務使一界陞提控一界於巡檢內遷用省

議大都運司通事比依本司令史滿考者於巡檢內任

用四年省准雲南諸路廉訪司寸白通事譯史出身

比依書吏出身九十月為滿歷巡檢一任轉陞從九品

雲南地面遷用七年宣慰司奏差除應例補者一百

二十月考滿依例自行保舉者降等任回添資定奪任

用廉訪司通事譯史大德元年三月七日已後勅入

補者九十月歷巡檢一任轉從九如書吏役九十月充

巡檢者聽如違不准各路譯史如係各道提舉學校

官選發腹裏各路譯史九十月考滿先歷務使一界陞

提領再歷一界充巡檢三考從九違者雖歷月日不准

會同館蒙古筆且齊九十月務提領內遷用十年

省准中政院寫懿旨筆且齊依寫聖旨筆且齊一體出

身八番順元海北海南宣慰司都元帥府極邊重地

令譯史人等考滿依兩廣福建例於江南遷用

凡官員致仕 至元二十八年省議諸職官年及七十精力衰耗例應致仕今到選官員多有年已七十或七十之上者合令依例致仕 大德七年省臣言內外官員年至七十者三品以下於應授品級加散官一等令致仕 十年省臣言官員年老不堪仕宦者於應得資品加散官遙授職事令致仕 皇慶二年省臣言蒙古色目官員所授散官卑於職事擬三品以下官員職事散官俱陞一等令致仕

凡封贈之制至元初唯一二勲舊之家以特恩見褒雖
略有成法未悉行之至元二十年制考課雖以五事責
辦管民官為無激勸之方徒示虛文竟無實効自今每
歲終考課管民官五事備具內外諸司官職任內各有
成効者為中考第一考對官品加妻封號第二考令子
弟承廕敘仕第三考封贈祖父母父母品格不及封贈
者量遷官品其有政績殊異者不次陞擢仰中書參酌
舊制出給誥命 至大二年詔流官五品以上父母正

妻七品以上正妻令尚書省議行封贈之制禮部集吏部翰林國史院集賢院太常等官議封贈謚號等第制以封贈非世祖所行其令罷之 至治三年省臣言封

贈之制本以激勸將來比因泛請者衆遂中輟詔從新設法議擬與行母致冗濫禮部從新分立等第 正從

一品封贈三代爵國公勲正上柱國從柱國母妻並國

夫人 正從二品封贈二代爵郡公勲正上護軍從護

軍母妻並郡夫人 正從三品封贈二代爵郡侯勲正

上輕車都尉從輕車都尉母妻並郡夫人 正從四品

封贈父母爵郡伯勲正上騎都尉從騎都尉母妻並郡

君 正五品封贈父母爵縣子勲驍騎尉母妻並縣君

從五品封贈父母爵縣男勲飛騎尉母妻並縣君

正從六品封贈父母父止用散官母妻並恭人 正從

一品至五品宣授六品至七品敕牒如應封贈三代者

曾祖父母一道祖父母一道父母一道生者各號給降

封贈者一品至五品並用散官勲爵六品七品止用

散官職事從一高 封贈曾祖降祖一等祖降父一等
父母妻並與夫子同父母在仕者不封已致仕并不在
仕者封之雖在仕棄職就封者聽 父母應封而讓曾
祖父母祖父母者聽 諸子應封父母嫡母在所生之
母不得封嫡母亡得並封若所生母未封贈者不得先
封其妻 諸職官曾受賊不許申請封贈之後但犯取
受之賊並行追奪其父祖元有官進一階不在追奪之
例 父祖元有官者隨其所帶文武官上封贈若已是

封贈之官止於本等官上許進一階階滿者更不在封

贈之限

如子官至四品其父祖已帶四品上階之類

或兩子當封者從一高

文武不同者從所請婦人因其子封贈而夫子兩有官

者從一高 封贈曾祖母祖母并母生封並加太字若

已亡歿或曾祖祖父父在者不加太字 職官居喪應

封贈曾祖父母祖父母者聽其應受封之人居曾祖父

母祖父母父母舅姑夫喪者服闋申請 應封贈者有

使遠死節有臨陳死事者驗事特議加封 應封妻者

止封正妻一人如正妻已歿繼室亦止封一人餘不在
封贈之例婦人因夫子得封者不許再嫁如不遵守將
所受宣敕追奪斷罪離異 父母曾任三品以上官亡
歿生前有勲勞為上知遇者子孫雖不仕其實跡赴所
在官司保結申請驗事跡可否量擬封贈無後者許有
司保結申請 曾祖父母祖父母父母曾犯十惡奸盜
除名等罪及例所封妻不是以禮娶到正室或係再醮
倡優婢妾並不許申請 凡告請封贈者隨朝并京官

行省行臺宣慰司廉訪司見任官各於任所申請其餘

官員見任并已除未任至得替日隨其解由申請致仕

官於所在官司申請 正從七品至正從六品止封一

次陞至正從五品封贈一次陞至正從四品封贈一次

陞至正從三品封贈一次陞至正從二品封贈一次陞

至正從一品封贈一次 凡封贈流官父祖曾任三品

以上者許請謚如立朝有大節功勲在王室者許加功

臣之號 至治三年詔封贈之典本以激勸忠孝今後

散官職事勲爵依例加授外任官員並許在任申請其餘合行事理仰各依舊制 泰定元年詔犯贓官員不得封贈沉鬱既久宜許自新有能滌慮改過再歷兩任無過者許所管上司正官從公保明監察御史廉訪司覆察是實並聽依例申請

科目

元以科目取士自延祐至元統凡七科具見前志既罷復興之後至正二年二月戊寅廷試舉人賜拜珠陳祖

仁等進士及第進士出身同進士出身有差凡七十有
八人國子生員十有八人蒙古人六名從六品出身色
目人六名正七品出身漢人南人共六名從七品出身
五年三月辛卯廷試舉人賜布延布哈張士堅等進士
及第進士出身同進士出身有差如前科之數國子生
員亦如之八年三月癸卯廷試舉人賜阿勒呼木特穆
爾王宗哲等進士及第進士出身同進士出身有差如
前科之數國子生員亦如之是年四月中書省奏准監

學生員每歲取及分生員四十人三年應貢會試者凡一百二十人除例取十八人外今後再取副榜二十人於內蒙古色目各四名前二名充司鑰下二名充侍儀舍人漢人取一十二人前三名充學正司樂次四名充學錄典籍管勾以下五名充舍人不願者聽其還齋十一年三月丙辰廷試舉人賜圖烈圖文允中等進士及第進士出身同進士出身有差凡八十有三人國子生員如舊制十二年三月有旨省院臺不用南人似有偏

負天下四海之內莫非吾民宜依世祖時用人之法南
人有才學者皆令用之自是累科南方之進士始有為
御史為憲司官為尚書者矣十四年三月乙巳廷試舉
人賜薛朝晤牛繼志等進士及第進士出身同進士出
身有差凡六十有二人國子生員如舊制十七年三月
廷試舉人賜倪徵王宗嗣等進士及第進士出身同進
士出身有差凡五十有一人國子生員如舊制十九年
中書左丞成遵建言宋自景祐以來百五十年雖無兵

禍常設寓試名額以待四方遊士今淮南河南山東四川遼陽等處及江南各省所屬州縣避兵士民會集京師如依前代故事別設流寓鄉試之科令避兵士民就試許在京官員及請俸掾譯史人等繫其鄉里親戚者結罪保舉行移大都路印卷驗其人數添差試官別為考校依各處元額選合格者充之則國有得人之效野無遺賢之歎矣既而監察御史亦建言此事中書送禮部定擬曾經殘破處所其鄉試元額蒙古色目漢人南

人總計一百三十有二人如今流寓儒人應試名數難同全盛之時其寓試解額合照依元額減半量擬取合格蒙古色目各十五名漢人二十名南人十五名通六十有五名中書省奏准如所擬行之而是歲福建行中書省初設鄉試定取七人為額而江西流寓福建者亦與試焉通取十有五人充貢于京師而陝西行省平章政事察罕特穆爾又請今歲八月鄉試河南舉人及避兵儒士不拘籍貫依河南省元額數就陝州置貢院應

試詔亦從之二十年三月廷試舉人賜邁珠魏元禮等
進士及第進士出身同進士出身有差凡三十有五人
國子生員如舊制二十三年三月丁未廷試舉人賜巴
拜楊輓等進士及第進士出身同進士出身有差凡六
十有二人國子生員如舊制是年六月中書省奏江淞
福建舉人涉海道以赴京有六人者已後會試之期宜
授以教授之職其下第三人亦以教授之職授之非徒
慰其跋涉險阻之勞亦以激勸遠方忠義之士二十五

年皇太子撫軍河東適當大比之歲庫庫特穆爾以江南四川等處皆阻于兵其鄉試不廢者唯燕南河南山東陝西河東數道而已乃啟皇太子倍增鄉貢之額二十六年三月廷試舉人賜哈達布哈張棟等進士及第二進士出身同進士出身有差凡七十有三人優其品秩第一甲授承直郎正六品第二甲授承務郎從六品第三甲授從仕郎從七品國子生員蒙古七名正六品色目六名從六品漢人七名正七品通二十人兵興已後

科目取士莫盛于斯而元之設科亦止於是歲云

元史卷八十四

元史卷八十四考證

選舉志四兩廣海北海南道於此發去八十月滿 按
海南原刻訛寧南今據百官志改

選舉志四部議如係六部選發考滿除正七品自用者
本衙門敘 按此數語即上將作院令史考例原刻
另作一條今據文義改并一項

選舉志四至元二十年部呈行省令譯史人等比臺院
一體出身按二十年原刻作三十年以前後紀年排

次自係二十年之訛今據永樂大典改

選舉志四其有政績殊異者不次陞擢 按不次原刻

訛不須今據通考改

選舉志四至治三年省臣言封贈之制 按此條為下

文封贈綱領自應另起原刻接連上書今據文義改

選舉志四正從六品母妻並恭人 按恭人原刻作宜

人今據元典章及通考改

欽定四庫全書蒼要卷六千四百六十四

史部

元史卷八十五

明翰林學士亞中大夫知制誥兼修國史宋濂等修

志第三十五

百官一

王者南面以聽天下之治建邦啟土設官分職其制尚
矣漢唐以來雖沿革不同恒因周秦之故以為損益亦
無大相遠大要欲得賢才用之以佐天子理萬民也元

太祖起自朔土統有其衆部落野處非有城郭之制國俗淳厚非有庶事之繁惟以萬戶統軍旅以斷事官治政刑任用者不過一二親貴重臣耳及取中原太宗始立十路宣課司選儒術用之金人來歸者因其故官若行省若元帥則以行省元帥授之草創之初固未暇為經久之規矣世祖即位登用老成大新制作立朝儀造都邑遂命劉秉忠許衡酌古今之宜定內外之官其總政務者曰中書省秉兵政者曰樞密院司黜陟者曰御

史臺體統既立其次在內者則有寺有監有衛有府在

外者則有行省有行臺有宣慰司有廉訪司其牧民者

則曰路曰府曰州曰縣官有常職位有常員其長則蒙

古人為之而漢人南人貳焉於是一代之制始備百年

之間子孫有所憑藉矣大德以後承平日久彌文之習

勝而質簡之意微僥倖之門多而方正之路塞官冗於

上吏肆於下言事者屢疏論列而朝廷訖莫正之勢固

然大抵元之建官繁簡因乎時得失係乎人故取其

簡牘所載而論次之若其因事而置事已則罷與夫異教雜流世襲之屬名類實繁亦姑舉其大槩作百官志三公太師太傅太保各一員正一品銀印以道變陰陽經邦國有元襲其名號特示尊崇太祖十二年以國王置太師一員太宗即位建三公其拜罷歲月皆不可考世祖之世其職常缺而僅置太保一員至成宗武宗而後三公並建而無虛位矣又有所謂大司徒司徒太尉之屬或置或不置其置者或開府或不開府而東宮嘗

置三師三少蓋亦不恒有也

中書令一員銀印典領百官會決庶務太宗以相臣為之世祖以皇太子兼之至元十年立皇太子行中書令大德十一年以皇太子領中書令延祐三年復以皇太子行中書令置屬監印二人

右丞相左丞相各一員正一品銀印統六官率百司居令之次令缺則總省事佐天子理萬機國初職名未創太宗始置右丞相一員左丞相一員世祖中統元年置

丞相一員二年復置右丞相二員左丞相二員至元二年增置丞相五員七年立尚書省置丞相二員八年罷尚書省乃置丞相二員二十四年復立尚書省其中書省丞相二員如故二十八年尚書省再罷專任一相武宗至大二年復置尚書省丞相二員中書丞相二員四年尚書省仍歸中書丞相凡二員自後因之不易文宗至順元年專任右相其一或置或不置

平章政事四員從一品掌機務貳丞相凡軍國重事無

不由之世祖中統元年置平章二員二年置平章四員
至元七年置尚書省設尚書平章二員八年尚書併入
中書平章復設三員二十三年詔清冗職平章汰為二
員二十四年復尚書省中書尚書兩省平章各二員二
十九年罷尚書省增中書平章為五員而一員為商議
省事三十年又增平章為六員成宗元貞元年改商議
省事為平章軍國重事武宗至大二年再立尚書省平
章三員中書五員四年罷尚書省歸中書平章仍五員

文宗至順元年定置四員自後因之

右丞一員正二品左丞一員正二品副宰相裁成庶務
號左右轄世祖中統二年置左右丞各一員三年增為
四員至元七年立尚書省中書右丞左丞仍四員八年
尚書併入中書省左右丞各一員二十三年汰冗職右
左丞如故二十四年復立尚書省右左丞各一而中書
省缺員二十八年復罷尚書省三十年設右丞二員而
一員為商議省事成宗元貞元年右丞商議省事者又

以昭文大學士與中書省事武宗至大二年復立尚書省右左丞二員中書右左丞五員四年罷尚書右左丞中書右左丞止設四員文宗至順元年定置右丞一員左丞一員而由是不復增損

參知政事二員從二品副宰相以參大政職亞于右左丞世祖中統元年始置參政一員二年增為二員至元七年立尚書省參政三員八年尚書併入中書參政二員二十三年汰冗職參政二員如故二十四年復立尚

書省參政二員中書參政二員二十八年罷尚書省參政武宗至大二年復置尚書省參政二員中書參政二員四年併尚書省入中書參政三員文宗至順元年定參政為二員自後因之

參議中書省事秩正四品典左右司文牘為六曹之管轄軍國重事咸預決焉中統元年始置一員至元二十二年累增至六員大德元年止置四員後遂為定額其治曰參議府令史二人

左司郎中二員正五品員外郎二員正六品都事二員
正七品中統元年置左右司至元十五年分置兩司左
司所掌吏禮房之科有九一曰南吏二曰北吏三曰貼
黃四曰保舉五曰議禮六曰時政記七曰封贈八曰牌
印九曰好事知除房之科有五一日資品二曰常選三
曰臺院選四曰見闕選五曰伯勒赫選戶雜房之科有
七一日定俸二曰衣裝三曰羊馬四曰置計五曰田土
六曰太府監七曰會總戶糧房之科有六一曰海運二

日儲運三曰邊遠四曰賑濟五曰事故六曰軍匠銀鈔
房之科有二一曰鈔法二曰課程應辦房之科有二一
曰飲膳二曰草料令史二人蒙古書寫一十八人回回
書寫一人漢人書寫七人典史十五人

右司郎中二員正五品員外郎二員正六品都事二員
正七品中統元年置左右司至元十五年分置兩司右
司所掌兵房之科有五一日邊關二曰展齊三曰鋪馬
四曰屯田五曰牧地刑房之科有六一曰法令二曰弭

盜三曰功賞四曰禁治五曰枉勘六曰鬪訟工房之科
有六一曰橫造軍器二曰常課段疋三曰歲賜四曰營
造五曰應辦六曰河道令史二人蒙古書寫三人回回
書寫一人漢人書寫一人典吏五人

中書省掾屬

監印二人掌監視省印有中書令則置
知印四人掌執用省印

克埒穆爾齊四人

蒙古筆且齊二十二人左司十六人右司六人

漢人省掾六十人左司三十九人右司二十一人
回回省掾十四人左司九人右司五人

宣使五十人

省醫三人

諤德齊四十一人

斷事官秩三品掌刑政之屬國初嘗以相臣任之其
名甚重其員數增損不常其人則皆御位下及中宮

東宮諸王各投下集賽台等人為之中統元年十六位下置三十一員至元六年十七位下置三十四員七年十八位下置三十五員八年始給印二十七
年分立兩省而斷事官隨省並置二十八年十八位
下置三十六員併入中書三十一年增二員後定置
御位下及諸王位下自共置四十一員首領官經歷
一員知事一員吏屬蒙古筆且齊二人令史一十二
人回回令史一人克埒穆爾齊二人知印二人奏差

八人典吏一人

客省使秩正五品使四員正五品副使二員正六品
令史一人掌直省舍人宣使等員選舉差遣之事至
元九年置使二員一員兼通事一員不兼大德元年
增置四員副二員直省舍人二員至元七年始置後
增至三十三員掌奏事給使差遣之役

檢校官四員正七品掌檢校左右司六部公事程期
文牘稽失之事書吏六人大德元年置

照磨一員正八品掌磨勘左右司錢穀出納營繕料
例凡數計文牘簿籍之事中統元年置二員至元八
年省為一員典吏八人

管勾一員正八品掌出納四方文移緘滕啟拆之事
郵遞之程期曹屬之承受兼主之中統元年置二員
至元三年定為一員典吏八人

架閣庫管勾二員正八品掌度藏省府籍帳案牘凡
備稽考之文即掌故之任至元三年始置二員其後

增置員數不一至順初定為二員典吏十人蒙古架閣庫兼管勾一員典吏二人回回架閣庫管勾一員典吏二人

吏部尚書三員正三品侍郎二員正四品郎中二員從五品員外郎二員從六品掌天下官吏選授之政令凡職官銓綜之典吏員調補之格封勲爵邑之制考課殿最之法悉以任之世祖中統元年以吏戶禮為左三部尚書二員侍郎二員郎中四員員外郎六員至元元年

以吏禮自為一部尚書三員侍郎仍二員郎中仍四員
員外郎三員三年復為左三部五年又合為吏禮部尚
書仍二員侍郎郎中員外郎各一員七年始立尚書六
部吏部尚書一員侍郎一員郎中二員員外郎二員八
年仍為吏禮部尚書侍郎郎中各一員員外郎仍二員
十三年分置吏部尚書增置七員侍郎三員郎中二員
員外郎四員十九年尚書裁為二員侍郎一員郎中一
員員外郎二員二十一年尚書三員侍郎一員郎中員

外郎如故二十三年定六部尚書侍郎郎中員外郎員
額各二員二十八年增尚書為三員主事三員蒙古筆
且齊三人令史二十五人回回令史二人克埒穆爾齊
一人知印二人奏差六人蒙古書寫二人銓寫五人典
吏一十九人

戶部尚書三員正三品侍郎二員正四品郎中二員從
五品員外郎三員從六品掌天下戶口錢糧田土之政
令凡貢賦出納之經金幣轉通之法府藏委積之實物

貨貴賤之直歛散准駁之宜悉以任之中統元年以吏
戶禮為左三部尚書二員侍郎二員郎中四員員外郎
六員至元元年分立戶部尚書三員侍郎郎中四員員
外郎省為三員三年復為左三部五年復分為戶部尚
書一員侍郎郎中各一員員外郎又省為二員七年始
立尚書六部尚書二員侍郎二員郎中二員員外郎如
故十三年尚書增置一員侍郎郎中員外郎如故十九
年郎中員外郎俱增至四員二十三年六部尚書侍郎

郎中定以二員為額明年以戶部所掌視他部特為繁劇增置二員成宗大德五年省尚書一員員外郎亦省一員各設三員主事八員蒙古筆且齊七人令史六十一人回回令史六人克埒穆爾齊一人知印二人奏差三十二人蒙古書寫一人典吏二十八人司計官四人其屬附見於後

都提舉萬億寶源庫掌寶鈔玉器至元二十五年始置都提舉一員正四品提舉一員正五品同提舉一

員從五品副提舉一員從六品知事一員從八品提
控案牘一員司吏二十三人譯史二人司庫四十六
人內以色目二人參之

都提舉萬億廣源庫掌香藥紙劄設置同上提控案
牘二員司吏一十二人譯史一人司庫一十三人

都提舉萬億綺源庫掌諸色段疋設置並同上而副
提舉則增一員提控案牘設三員後省二員司吏二
十二人譯史一人司庫二十六人內參用色目二人

都提舉萬億賦源庫掌絲綿布帛諸物設置並同上
提控案牘二員其後省一員司吏一十七人譯史一
人司庫一十五人內參用色目二人

四庫照磨兼架閣庫管勾一員從九品世祖至元二
十八年以四庫錢帛事繁始置一員仍給印

提舉富寧庫至元二十七年始創提舉一員從五品
同提舉一員從六品副提舉一員從七品分掌萬億
寶源庫出納金銀之事吏目一人其後司吏增至六

人譯史一人司庫八人

諸路寶鈔提舉司達魯噶齊一員正四品都提舉一員正四品副達魯噶齊一員正五品提舉一員正五品同提舉一員從五品副提舉二員從六品知事一員從八品照磨一員從九品國初戶部兼領交鈔公事世祖至元始設交鈔提舉司秩正五品二十四年改諸路寶鈔都提舉司陞正四品增副達魯噶齊提控案牘各一員其後定置已上官員提控案牘又增

一員設司吏十二人蒙古筆且齊一人回回令史一人奏差七人

寶鈔總庫達魯噶齊一員從五品大使一員從五品副使三員正七品世祖至元二十五年改元寶庫為寶鈔庫秩正六品二十六年陞從五品增大使副使設司庫其後遂定置已上官員司吏七人譯史一人司庫五十人

印造寶鈔庫達魯噶齊一員正七品大使二員從七

品副使二員正八品中統四年始置秩從八品至元二十四年陞從七品增達魯噶齊一員其後遂定置已上官員

燒鈔東西二庫達魯噶齊一員正八品大使一員從八品副使一員從九品至元元年始置昏鈔庫用正九品印置監燒昏鈔官二十四年分立燒鈔東西二庫秩從八品各置達魯噶齊大使副使等員

行用六庫中統元年初立中都行用庫秩從七品提

領一員從七品大使一員從八品副使一員從九品
至元二十四年京師改置庫者三曰光熙曰文明曰
順承因城門之名為額二十六年又置三庫曰健德
曰和義曰崇仁並因城門以為名

大都宣課提舉司掌諸色課程併領京城各市提舉
二員從五品同提舉一員從六品副提舉一員從七
品提控案牘一員司吏六人世祖至元十九年併大
都舊城兩稅務為大都稅課提舉司至武宗至大元

年改宣課提舉司其屬四

馬市猪羊市秩從七品提領一員從七品大使一員從八品副使一員從九品世祖至元三十年始置

牛驢市果木市品秩設官同上

魚鱉市大使一員副使二員至大元年始置

煤木所提領一員從八品大使一員從九品副使一員至元二十二年始置

大都酒課提舉司掌酒醋榷酤之事至元十九年始
置提舉一員從五品同提舉二員從六品副提舉二
員從七品提控案牘二員司吏五人二十八年省同
提舉一員副提舉一員餘如故

抄紙坊提領一員正八品大使一員從八品副使二
員從九品中統四年始置用九品印止設大使副使
各一員至元二十七年陞正八品增置提領副使各
一員

印造鹽茶等引局大使一員副使一員至元二十四年置掌印造腹裏行省鹽茶礬鐵等引仍置攢典庫子各一人

右以上屬戶部其萬億四庫國初以太府掌內帑之出納既設左藏等庫而國計之領在戶部仍置萬億等庫為收藏之府中統元年置庫官六員而未有品秩俸給至元十六年始為提舉萬億庫秩正五品二十四年改陞都提舉萬億庫秩正四品

二十五年分立四庫以分掌出納至二十七年又別立富寧庫焉

京畿都漕運使司秩正三品運使二員正三品同知二員正四品副使二員正五品判官二員正六品經歷一員正七品知事一員從八品提控案牘兼照磨二員掌凡漕運之事世祖中統二年初立軍儲所尋改漕運所至元五年改漕運司秩五品十二年改都漕運司秩五品十九年改京畿都漕運使司秩正三

品二十四年內外分立兩運司而京畿都漕運司之額如舊止領在京諸倉出納糧斛及新運糧提舉司站車攢運公事省同知運判知事各一員而押綱官隸焉延祐六年增同知副使運判各一員其後定置官員已上正官各二員首領官四員吏屬令史二十一人譯史二人回回令史一人通事一人知印二人奏差一十六人典吏二人其屬二十有四

新運糧提舉司秩正五品至元十六年始置管站

車二百五十輛隸兵部開設運糧埧河改隸戶部
定置達魯噶齊一員都提舉一員同提舉二員副
提舉一員吏目一員司吏八人奏差十二人

京師二十二倉秩正七品

萬斯北倉

中統二年置

萬斯南倉

至元二十四年置

千斯倉

中統二年置

永平倉

至元十六年置

永濟倉

至元四年置

惟億倉

既盈倉

大有倉

並係皇慶元年置

屢豐倉

積貯倉

並係皇慶元年增置

已上十倉每倉各置監支納一員正七品大使

二員從七品副使二員正八品

豐穰倉

皇慶元年置

廣濟倉

皇慶元年置

廣衍倉

至元二十年置

大積倉

至元二十年置

旣積倉

盈衍倉

至元二十年置

相因倉

中統二年置

順濟倉

至元二十年置

已上八倉每倉各置監支納一員正七品大使

一員從七品副使二員正八品

通濟倉

中統二年置

慶貯倉

至元四年置

豐潤倉

至元十六年置

豐實倉

已上四倉每倉各置監支納一員正七品大使
一員從七品副使一員正八品

通惠河運糧千戶所秩正五品掌漕運之事至元
三十一年始置中千戶一員中副千戶二員

都漕運使司秩正三品掌御河上下至直沽河西務
李二寺通州等處攢運糧斛至元二十四年自京畿
運司分立都漕運司於河西務置總司分司臨清運

使二員正三品同知二員正四品副使二員正五品
運判三員正六品經歷一員從七品知事一員從八
品提控案牘二員內一員兼照磨司吏三十三人通
事譯史各一人奏差一十六人典吏一人其屬七十
有五

河西務十四倉秩正七品

永備南倉

永備北倉

廣盈南倉

廣盈北倉

充溢倉

已上五倉各置監支納一員正七品大使二員
從七品副使二員正八品

崇墉倉

大盈倉

大京倉

大稔倉

足用倉

豐儲倉

豐積倉

恒足倉

既備倉

已上九倉各置監支納一員正七品大使一員
從七品副使一員正八品

通州十三倉秩正七品

有年倉

富有倉

廣儲倉

盈止倉

及秭倉

迺積倉

樂歲倉

慶豐倉

延豐倉

已上九倉各置監支納一員正七品大使二員

從七品副使二員正八品

足食倉

富儲倉

富衍倉

及衍倉

已上四倉各置監支納一員正七品大使二員

從七品副使一員正八品

河倉一十有七用從七品印

館陶倉

舊縣倉

陵州倉

傅家池倉

已上各置監支納一員從七品大使一員從八

品副使一員

秦家渡倉

尖冢西倉

尖冢東倉

長蘆倉

武強倉

夾馬營倉

上口倉

唐宋倉

唐村倉

安陵倉

四柳樹倉

淇門倉

伏恩倉

已上各置監支納一員從八品大使一員從九

品副使一員

直沽廣通倉秩正七品大使一員

滎陽等綱凡三十曰濟源曰陵州曰獻州曰白馬

曰滏陽曰完州曰河內曰南宮曰沂莒曰霸州曰

東明曰獲嘉曰鹽山曰武強曰膠水曰東昌曰武
安曰汝寧曰修武曰安陽曰開封曰儀封曰蒲臺
曰鄒平曰中牟曰膠西曰衛輝曰濬州曰曹濮州
每網皆設押網官二員計六十員秩正八品每編
船三十隻為一網船九百餘隻運糧三百餘萬石
船戶八千餘戶網官以常選正八品為之

檀景等處採金鐵冶都提舉司秩正四品提舉一員
正四品同提舉一員正五品副提舉一員從六品掌

各冶採金煉鐵權貨以資國用國初中統始置景州
提舉司管領景州灤陽新匠三冶至元十四年又置
檀州提舉司管領雙峰暗峪大峪五峯等冶大德五
年檀州景州三提舉司併置檀州等處採金鐵冶都
提舉司而灤陽雙峰等冶悉隸焉他如河東山西濟
南萊蕪等處鐵冶提舉司及益都般陽等處淘金總
管府其沿革蓋不一也

大都河間等路都轉運鹽使司秩正三品掌場竈權

辦鹽貨以資國用使二員正三品同知一員正四品
副使一員正五品運判二員正六品首領官經歷一
員從七品知事一員從八品照磨一員從九品國初
立河間稅課達嚕噶齊清滄鹽使所後勅立運司立
提舉鹽樞所又改為河間路課程所提舉清滄鹽課
使所中統三年改都提領拘樞滄清課鹽所至元二
年以刑部侍郎右三部郎中兼滄清課鹽使司尋改
立河間都轉運鹽使司立清滄課三鹽司十二年改

為都轉運使司十九年以戶部尚書行河間等路都
轉運使司事尋罷改立清滄二鹽使司二十三年改
立河間等路都轉運司二十七年改令戶部尚書行
河間等路都轉運使司事二十八年改河間等路都
轉運司延祐六年頒分司印巡行郡邑以防私鹽之
弊

鹽場二十二所每場設司令一員從七品司丞一
員從八品辦鹽各有差

利國場 利民場 海豐場 阜民場

阜財場 益民場 潤國場 海阜場

海盈場 海潤場 嚴鎮場 富國場

興國場 厚財場 豐財場 三义沽場

蘆臺場 越支場 石碑場 濟民場

惠民場 富民場

山東東路轉運鹽使司品秩職掌同上運判止一員
國初始置益都課稅所管領山東鹽場以總鹽課後

改置運司中統四年詔以中書左右部兼諸路都轉
運司至元二年命有司兼辦其課改立山東轉運司
至元十二年改立都轉運司延祐五年以鹽法滯
降分司印巡行各場督收課程罷膠萊鹽司所屬鹽
場

鹽場一十九所每場設司令一員從七品司丞一
員從八品管勾一員從八品

永利場 寧海場 官臺場 豐國場

新鎮場 豐民場 富國場 高家港場

永阜場 利國場 固堤場 王家岡場

信陽場 濤洛場 石河場 海滄場

行村場 登寧場 西由場

河東陝西等處轉運鹽使司品秩職掌同前運判增
一員國初設平陽府以徵課程之利中統二年改置
轉運司置提舉解鹽司至元二年罷運司命有司掌
其務尋復置轉運司二十二年立陝西都轉運司諸

色稅課悉隸焉二十九年置鹽運司專掌鹽課其餘
課稅歸有司解鹽司亦罷延祐六年更為河東陝西
等處都轉運鹽使司隸省部其屬三

解鹽場管勾一員正九品同管勾一員從九品

河東等處解鹽管民提領所正提領一員從八品

副提領一員從九品

安邑等處解鹽管民提領所正提領一員從八品

副提領一員從九品

禮部尚書三員正三品侍郎二員正四品郎中二員從五品員外郎二員從六品掌天下禮樂祭祀朝會燕享貢舉之政令凡儀制損益之文符印簡冊之信神人封諡之法忠孝貞義之褒送迎聘好之節文學僧道之事婚姻繼續之辨音藝膳供之物悉以任之世祖中統元年以吏戶禮為左三部置尚書二員侍郎二員郎中四員員外郎六員總領三部之事至元元年分立為吏禮部尚書三員侍郎仍二員郎中仍四員員外郎四員七

年別立禮部尚書三員侍郎一員郎中二員員外郎如
舊明年又合為吏禮部十三年又別為禮部二十三年
六部尚書侍郎郎中員外郎定以二員為額成宗元貞
元年復增尚書一員領會同館事主事二員蒙古筆且
齊二人令史一十九人回回令史二人克埒穆爾齊一
人知印二人奏差十二人典史三人其屬附見

左三部照磨所秩正八品照磨一員掌吏戶禮三部
錢穀計帳之事典史八人

侍儀司秩正四品掌凡朝會即位冊后建儲奉至尊
號及外國朝覲之禮至元八年始置左右侍儀奉御
二員禮部侍郎知侍儀事一員引進使知侍儀事一
員左右侍儀使二員左右直侍儀使二員左右侍儀
副使二員左右侍儀僉事二員引進副使侍儀令承
奉班都知尚衣局大使各一員十二年省左侍儀奉
御通曰左右侍儀省引進副使及侍儀令尚衣使等
員改置通事舍人十四員三十年減通事舍人七員

為侍儀舍人大德十一年陞秩正三品至大二年置
典簿一員延祐七年定置侍儀使四員至治元年增
置通事舍人六員侍儀舍人四員其後定置侍儀使
四員正三品引進使知侍儀事二員正四品首領官
典簿一員從七品屬官承奉班都知一員正七品通
事舍人一十六員從七品侍儀舍人十四員從九品
吏屬令史二人譯史一人通事一人知印一人其屬
法物庫秩五品掌大禮法物提點一員從五品大使

一員從六品副使一員從七品直長二員正八品

拱衛直都指揮使司秩從四品掌控鶴六百餘戶及

儀衛之事至元三年始置都指揮使一員副使一員

鈐轄一員提控案牘一員十六年陞正三品降虎符

增置達魯噶齊一員隸宣徽院二十年復為從四品

二十五年歸隸禮部元貞元年復陞正三品皇慶元

年置經歷一員二年改鈐轄為僉事至順二年撥隸

侍正府定置達魯噶齊一員正三品都指揮使四員

正三品副指揮使二員從三品僉事二員正四品首
領官經歷一員從七品知事一員從八品吏屬令史
四人譯史一人通事知印各一人奏差二人其屬控
鶴百戶所秩從七品色目百戶一十三員漢人百戶
一十三員總十三所

儀從庫秩從七品掌收儀衛器仗大使一員從七
品副使一員從八品

儀鳳司秩正四品掌樂工供奉祭饗之事至元八年

立玉宸院置樂長一員樂副一員樂判一員二十年
改置儀鳳司隸宣徽院置大使副使各一員判官三
員二十五年歸隸禮部省判官三員三十一年置達
魯噶齊一員副使一員大德十一年改陞玉宸樂院
秩從二品置院使副使僉事同僉院判至大四年復
為儀鳳司秩正三品延祐七年降從三品定置大使
五員從三品副使四員從四品首領官經歷一員從
七品知事一員從八品吏屬令史二人譯史通事知

印各一人其屬五

雲和署秩正七品掌樂工調音律及部籍更番之事至元十二年始置至大二年撥隸玉宸樂院皇慶元年陞正六品二年陞從五品署令二員署丞二員管勾二員協音一員協律一員書史二人書吏四人教師二人提控四人

安和署秩正七品職掌與雲和同至元十三年始置皇慶二年陞從五品署令二員署丞二員管勾

二員協音一員協律一員書史二人書吏四人教師二人提控四人

常和署初名管勾司秩正九品管領回回樂人皇慶元年初置延祐三年陞從六品署令一員署丞二員管勾二員教師二人提控二人

天樂署初名昭和署秩從六品管領河西樂人至元十七年始置大德十一年陞正六品至大四年改為天樂署皇慶元年陞從五品署令二員署丞

二員管勾二員協音一員協律一員書史二人書吏四人教師二人提控四人

廣樂庫秩從九品掌樂器等物大使一員副使一員皇慶元年始置

教坊司秩從五品掌承應樂人及管領興和等署五百戶中統二年始置至元十二年陞正五品十七年改提點教坊司隸宣徽院秩正四品二十五年隸禮部大德八年陞正三品延祐七年復正四品達魯噶

齊一員正四品大使三員正四品副使四員正五品
知事一員從八品令史四人譯史知印奏差各二人
通事一人其屬三

興和署秩從六品署令二員署丞二員管勾二員
祥和署秩從六品署令二員署丞二員管勾二員
廣樂庫秩從九品大使一員副使一員

會同館秩從四從掌接伴引見諸番蠻夷峒官之來
朝貢者至元十三年始置二十五年罷之二十九年

復置元貞元年以禮部尚書領館事遂為定制禮部
尚書領會同館事一員正三品大使二員正四品副
使二員從六品提控案牘一員掌書四人蒙古筆且
齊一人典給官八人其屬有收支諸物庫秩從九品
大使一員副使一員至元二十九年以四宿庫改置
鑄印局秩正八品掌凡刻印銷印之事大使一員副
使一員直長一員至元五年始置

白紙坊秩從八品掌造詔旨宣勅紙劄大使一員副

使一員至元九年始置

掌薪司秩正七品司令一員正七品司丞二員正八品典吏一人

兵部尚書三員正三品侍郎二員正四品郎中二員從五品員外郎二員從六品掌天下郡邑郵驛屯牧之政令凡城池廢置之故山川險易之圖兵站屯田之籍遠方歸化之人官私芻牧之地馳馬牛羊鷹隼羽毛皮革之徵驛乘郵運祇應公廨阜隸之制悉以任之世祖中

統元年以兵刑工為右三部置尚書二員侍郎二員郎中五員員外郎五員總領三部之事至元元年別置工部以兵刑自為一部尚書四員侍郎三員郎中如舊員外郎五員三年併為右三部五年復為兵刑部尚書二員省侍郎二員郎中如故員外郎一員七年始列六部尚書一員侍郎仍舊郎中一員員外郎仍一員明年又合為兵刑部十三年復析兵部二十三年定尚書侍郎郎中員外郎額皆二員至治三年增尚書一員主事二

員蒙古筆且齊二人令史十四人回回令史一人克瑀
穆爾齊一人知印二人奏差八人典吏三人其屬附見
大都陸運提舉司秩從五品掌兩都陸運糧斛之事
至元十六年始置運糧提舉司延祐四年改今名提
舉二員從五品副提舉一員從七品吏目一員司吏
六人委差一十人海王庄七里庄魏家庄牘八庄四
所各設提領一人用從九品印

管領隨路打捕鷹房民匠總管府秩從三品達魯噶

齊一員總管一員副總管二員經歷知事各一員提
控案牘一員令屬令史六人初太祖以隨路打捕鷹
房民戶七千餘戶撥隸實喇大王位下中統二年始
置至元十二年阿布哈大王遣使奏歸朝廷隸兵部
管領本投下大都等路打捕鷹房諸色人匠都總管
府秩正三品掌格藏大王位下事大德八年始置官
吏皆王選用至大四年省併衙門以哈喇班第大王
遠鎮一隅別無官屬存設不廢定置府官達魯噶齊

二員總管一員同知一員副總管一員知事一員提
控案牘一員令史四人譯史二人奏差二人典吏一
人其屬東局織染提舉司秩從五品達魯噶齊一員
提舉一員副達魯噶齊一員副提舉一員提控案牘
一員司吏二人

隨路諸色民匠打捕鷹房等戶都總管府秩從三品
達魯噶齊一員總管一員同知一員經歷一員知事
一員提控案牘兼照磨一員令史六人譯史一人知

印通事一人奏差二人掌布濟克大營盤事及管領
大都路打捕鷹房等戶至元十三年置延祐四年陞
正三品

管領本位下打捕鷹房民匠等戶都總管府秩正三
品達魯噶齊一員總管一員副達魯噶齊一員同知
一員副總管一員判官一員經歷一員知事一員提
控案牘兼照磨一員令史六人譯史通事知印各一
人掌布濟克大營盤城池阿哈探馬兒一應差發色

徹肯定王位下事泰定元年始置

刑部尚書三員正三品侍郎二員正四品郎中二員從五品員外郎二員從六品掌天下刑名法律之政令凡大辟之按覆繫囚之詳讞孥收產沒之籍捕獲功賞之式冤訟疑罪之辨獄具之制度律令之擬議悉以任之世祖中統元年以兵刑工為右三部置尚書二員侍郎二員郎中五員員外郎五員以郎中員外郎各一員專署刑部至元元年析置工部而兵刑仍為一部尚書四

員侍郎仍二員郎中四員員外郎置五員三年復為右
三部七年始別置刑部尚書一員侍郎一員郎中一員
員外郎二員八年改為兵刑部十三年又為刑部二十
三年六部尚書侍郎郎中員外郎定以二員為額大德
四年尚書增置一員其首領官則主事三員吏屬則蒙
古筆且齊四人令史三十人回回令史二人克埒穆爾
齊一人知印二人奏差十人書寫三人典吏七人其屬
附見

司獄司司獄一員正八品獄丞一人正九品獄典一人初以右三部照磨兼刑部繫獄之任大德七年始置專管部醫一人掌調視病囚

司籍所提領一員同提領一員至元二十年改大都等路斷沒提領所為司籍所隸刑部

工部尚書三員正三品侍郎二員正四品郎中二員從五品員外郎二員從六品掌天下營造百工之政令凡城池之修濬土木之繕葺材物之給受工匠之程式銓

注局院司匠之官悉以任之世祖中統元年右三部置
尚書二員侍郎二員郎中五員員外郎五員內二員專
署工部事至元元年始分立工部尚書四員侍郎三員
郎中四員員外郎五員三年復合為右三部七年仍自
為工部尚書二員侍郎仍二員郎中三員員外郎如舊
二十三年定尚書侍郎郎中員外郎各以二員為額明
年以曹務繁冗增尚書二員二十八年省尚書一員首
領官主事五員蒙古筆且齊六人令史四十二人回回

令史四人克埒穆爾齊一人知印一人奏差三十人蒙古書寫一人典吏七人又司程官四員右三部照磨一員典吏七人其屬附見

左右部架閣庫秩正八品管勾二員典吏十二人掌六部文卷簿籍架閣之事中統元年左右部各置至元二十三年併為左右部架閣庫

諸色人匠總管府秩正三品掌百工之技藝至元十二年始置總管同知副總管各一員十六年置達魯

噶齊一員增同知副總管各一員二十八年省同知
一員三十年省副總管一員後定置達嚕噶齊一員
總管一員同知二員副總管二員經歷一員知事一
員提控案牘一員令史五人譯史一人奏差四人其
屬十有一

梵像提舉司秩從五品提舉一員同提舉一員副
提舉一員吏目一員董繪畫佛像及土木刻削之
工至元十二年始置梵像局延祐三年陞提舉司

設今官

出蠟局提舉司秩從五品提舉一員同提舉一員
副提舉一員吏目一員掌出蠟鑄造之工至元十
二年始置局延祐三年陞提舉司設今官

鑄瀉等銅局秩從七品大使一員副使一員掌鑄
瀉之工至元十年始置官三員二十八年省管勾
一員後定置二員

銀局秩從七品大使一員直長一員掌金銀之工

至元十二年始置

鑄鐵局秩從八品大使一員掌鑄鐵之工至元十二年始置

瑪瑙玉局秩從八品直長一員掌琢磨之工至元十二年始置

石局秩從七品大使一員管勾一員董攻石之工至元十二年始置

木局秩從七品大使一員直長一員董攻木之工

至元十二年始置

油漆局副使一員用從七品印董髹漆之工至元十二年始置

諸物庫秩正九品提領一員副使一員掌出納諸物之事至元十二年始置

管領隨路人匠都提舉所提領一員大使一員俱受省檄掌工匠詞訟之事至元十二年始置

諸司局人匠總管府秩正三品達魯噶齊一員總管

一員副達魯噶齊一員同知一員副總管一員經歷
一員知事一員提控案牘一員令史四人領兩都金
銀器盒及符牌等一十四局事至元十四年置二十
四年以八局改隸工部及金玉府止領五局一庫掌
氊毯等事其屬有六

收支庫秩正九品大使一員掌出納之物

大都氊局秩從七品大使副使各一員管人匠一
百二十有五戶

大都染局秩從九品大使一員管人匠六千有三
戶

上都氈局秩從五品大使一員副使一員管人匠
九十有七戶

隆興氈局大使一員副使一員管人匠一百戶
剪毛花毯蠟布局大使一員副使一員管人匠一
百一十有八戶

提舉右八作司秩正六品提舉二員同提舉一員副

提舉一員吏目一人司吏九人司庫十三人譯史一人秤子一人掌出納內府漆器紅氈捎隻等并在都局院造作鑲鐵銅鋼鍮石東南簡鐵兩都支持皮毛雜色羊毛生熟斜皮馬牛等皮駝尾雜行薩哩圖等物中統三年始置提領八作司秩正九品至元二十五年改陞提舉八作司秩正六品二十九年以出納委積分為左右兩司

提舉左八作司秩正六品掌出納內府氈貨柳器等

物其設置官員同上

諸路雜造總管府秩正三品至元元年改提領所為
提舉司十四年又改工部尚書行諸路雜造局總管
府定置達魯噶齊一員總管一員同知一員副總管
一員知事一員提控案牘一員令史六人譯史一人
其屬二

廉綱局大使一員副使一員並受省劄至元元年
始置

收支庫大使一員副使一員至元三十年始置

齊達勒局總管府秩正三品管領諸色人匠造作等
事憲宗朝置至元十六年始設總管一員二十七年
置同知一員後定置府官達魯噶齊一員總管一員
同知一員知事一員提控案牘一員司吏四人其屬
二

諸司局用從七品印提領一員相副官二員中統
三年始置

收支庫提領一員大使副使各一員掌造作出納之物

大都人匠總管府秩從三品至元六年始置達魯噶齊一員總管一員同知一員經歷一員提控案牘一員令史十人通事一人其屬四

綉局用從七品印大使一員副使一員掌綉造諸王百官段匹

紋錦總院提領一員大使一員副使一員掌織諸

王百官段匹

涿州羅局提領一員大使一員掌織造紗羅段匹
尚方庫提領一員大使副使各一員掌出納絲金
顏料等物

隨路諸色民匠都總管府秩正三品掌仁宗潛邸諸
色人匠延祐六年撥隸崇祥院後又屬將作院至元
三年歸隸工部後定置達魯噶齊一員總管一員同
知一員副總管一員經歷一員知事一員提控案牘

一員照磨一員令史八人譯史二人知印通事各一人奏差四人其屬五

織染人匠提舉司秩從七品至大二年設達魯噶齊一員提舉一員同提舉一員副提舉一員吏目一員

雜造人匠提舉司秩從七品設置官屬同上

大都諸色人匠提舉司秩從五品達魯噶齊一員提舉一員同提舉一員副提舉一員吏目一員

大都等處織染提舉司秩從五品管阿南達王位
下人匠一千三百九十八戶達魯噶齊一員提舉
一員同提舉一員副提舉一員吏目一員

收支諸物庫秩從七品提領一員大使一員副使
一員庫子二人

提舉都城所秩從五品提舉二員同提舉二員副提
舉二員吏目一員照磨一員掌修繕都城內外倉庫
等事至元三年置其屬一左右廂官四員用從九品

印至元十三年置

受給庫秩正八品提領一員大使一員副使一員掌
京城內外營造木石等事至元十三年置

符牌局秩正八品大使一員副使一員直長一員掌
造虎符等至元十七年置

旋匠提舉司秩從五品提舉一員副提舉一員至元
九年置

薩達克齊提舉司秩正五品提舉一員副提舉一員

提控案牘一員至元二十四年以扎瑪里鼎率人匠
成造薩達克齊與絲紬同局造作遂改組練人匠提
舉司為薩達克齊提舉司

已實伯里局秩從七品大使一員副使一員掌織造
御用領袖納奇實等段至元十三年始置

和坦巴哩局大使一員給從七品印至元三年置

平則門窯場提領一員大使一員副使一員給從六

品印至元十三年置

光熙門窯場提領一員大使一員副使一員給從八品印至元二十五年置

大都皮貨所提領一員大使一員副使一員用從九品印至元二十九年置

通州皮貨所提領一員大使一員副使一員用從九品印延祐六年置

晉寧路織染提舉司提舉一員照磨案牘一員其屬提領所一係官織染人匠局一雲內人匠東西局二

本路人匠局一河中府襄陵翼城潞州隰州澤州雲州等局七每局各設提領一員副提領一員惟澤州雲州則止設提領一員

翼寧路織染提舉司真定路織染提舉司各置提舉一員同提舉一員副提舉一員照略案牘一員其屬
二

開除局大使一員副使一員照略案牘一員
真定路紗羅兼雜造局大使一員副使一員

南宮中山織染提舉司各設提舉一員同提舉副提舉一員照略案牘一員

中山劉元帥局大使一員副使一員

中山綽羅局大使一員副使一員

深州織染局大使一員副使一員照略案牘一員

深州趙良局大使一員副使一員

弘州人匠提舉司提舉一員同提舉一員副提舉一員

員照略案牘一員

納奇實毛段二局院長一員

雲內州織染局大使一員副使一員照略案牘一員
大同織染局大使一員副使一員照略案牘一員
朔州毛子局大使一員

恩州織染局大使一員副使一員照略案牘一員
恩州東昌局提領一員

保定織染提舉司提舉一員同提舉一員副提舉一員
照略案牘一員

大名人匠提舉司提舉一員同提舉一員副提舉一員照略案牘一員

永平路紋錦等局提舉司提舉一員同提舉一員副提舉一員照略案牘一員

大寧路織染局大使一員副使一員照略案牘一員雲州織染提舉司提舉一員同提舉一員副提舉一員照略案牘一員

順德路織染局大使一員副使一員照略案牘一員

彰德路織染人匠局大使一員副使一員照略案牘一員

懷慶路織染局大使一員副使一員照略案牘一員
巴實伯里局官一員

宣德府織染提舉司提舉一員同提舉一員副提舉一員
照略案牘一員

東聖州織染局院長一員局副一員

宣德博囉局提領一員副使一員

東平路鹽局直長一員

興和路尋麻林人匠提舉司提舉一員同提舉一員
副提舉一員照略案牘一員



門天城織染局提領一員副使一員照磨案牘一員
巡河提領所提領二員副提領一員

元史卷八十五



總校官編修臣吳紹濬